

摘藻堂四庫全書薈要

集部

欽定四庫全書薈要

集部

東坡全集卷二

詳校官助教<sub>臣</sub>常循



欽定四庫全書薈要卷一萬四千八百三十三

集部

東坡全集卷一

宋 蘇軾 撰

詩四十九首

辛丑十一月十九日既與子由別於鄭州西門  
之外馬上賦詩一篇寄之



不飲胡為醉兀兀此心已逐歸鞍發歸人猶自念庭闈  
今我何以慰寂寞登高回首坡隴隔惟見烏帽出復沒  
苦寒念爾衣裘薄獨騎瘦馬踏殘月路人行歌居人樂

僮僕怪我苦悽惻亦知人生要有別但恐歲月去飄忽  
寒燈相對記疇昔夜雨何時聽蕭瑟君知此意不可忘

慎勿苦愛高官職

嘗有夜雨對床  
之言故云爾

和子由澠池懷舊

人生到處知何似應似飛鴻踏雪泥泥上偶然留指爪  
鴻飛那復計東西老僧已死成新塔壞壁無由見舊題  
往日崎嶇還記否路長人困蹇驢嘶

往歲馬死于二  
陵騎驢至澠池

次韻和劉京兆石林亭之作石本唐苑中物散

流民間劉購得之

都城日荒廢往事不可還  
惟餘故苑石漂散向人間  
公來始購蓄不憚道里艱  
盡從塵埃中來對冰雪  
顏瘦骨拔凜凜蒼根漱潺湲  
唐人唯竒章好石古莫攀  
盡令屬牛氏刻鑿紛班班  
嗟此本何常聚散實循環  
人失亦人得要不出區寰  
君看劉李末不能保河關  
况此百株石鴻毛於泰山  
但當對石飲萬事付等閒

壬寅二月有詔令郡史分往屬縣減決囚禁十

三日受命出府至寶雞號郿蓋屋四縣既畢事  
因朝謁太平宮而宿于南溪溪堂遂並南山而  
西至樓觀大秦寺延生觀仙遊潭十九日迺歸  
作詩五百言以記凡所經歷者寄子由

遠人罹水旱王命釋俘囚分縣傳明詔循山得勝遊蕭  
條初出郭曠蕩實消憂薄暮來孤鎮登臨憶武侯崢嶸  
依絕壁蒼茫瞰奔流半夜人呼急橫空火氣浮天遙殊  
不辨風急已難收曉入陳倉縣猶餘賣酒樓煙煤已狼

藉吏卒尚呀咻

十三日宿武城鎮即俗所謂石鼻寨也云孔明所築是夜二鼓竇鷄火作相去

三十里而見于武城

雞嶺雲霞古龍宮殿宇幽

縣有雞爪峯龍宮寺

南山連

大散歸路走吾州欲往安能遂將還為少留回趨西虢

道却渡小河洲聞道磻溪石猶存渭水頭蒼崖雖有迹

大釣本無鉤

十四日自寶雞行至虢聞太公磻溪石在縣東南十八里猶有投竿跪餌兩膝所著

之處東去過郿塢孤城象漢劉誰言董公健竟復伍孚讎

白刃俄生肘黃金漫似丘

十五日至郿縣縣有董卓城其城象長安俗謂之小長安

平生聞太白一見駐行騶鼓角誰能試風雷果致不巖

崖已竒絕冰雪更凋鏤春旱憂無麥山靈喜有湫蛟龍

懶方睡餅罐小容偷

是日晚自郿起至青秋鎮宿道過太白山相傳云軍行鳴鼓角過山

下輒致雷雨山上有湫甚靈以今歲旱方議取之

二曲林泉勝三川氣象侔近

山薶麥早臨水竹篁脩

十六日至盤屋以近山地美氣候殊早縣有官竹園十數里不

絕

先帝膺符命行宮畫冕旒侍臣簪武弁女樂抱笙篴

秘殿開金鑠神人控玉蚪黑衣橫巨劔被髮凜雙眸

十七

日寒食自盤屋東南行二十餘里朝謁太平宮二聖御容此宮乃太宗皇帝時有神降于道士張守真以告受命之符所為立也神  
邂逅逢佳士相將弄綵舟投篙披

封翊聖將軍有殿



綠苻濯足亂清溝晚宿南溪上森如水國秋遶湖栽翠

密終夜響颼颼

是日與監宮張杲之汎舟南溪遂宿于溪堂

冒曉窮幽邃操

戈畏炳彪

十八日循終南而西縣尉以甲卒見送或云近官竹園往往有虎

尹生猶有

宅老氏舊停輶問道遺蹤在登仙往事悠馭風歸汗漫

閱世似蜉蝣羽客知人意瑤琴繫馬鞦不辭山寺遠來

作鹿鳴啣帝子傳聞李巖堂髣像緜輕風幃幔卷落日

髣髴愁入谷

音浴

驚蒙密登坡費挽亂峰巉似梨一水

淡如油中使何年到金龍自古投千重橫翠石百丈見

游儵最愛泉鳴洞初嘗雪入喉滿餅雖可致洗耳歎無

由

是日遊崇聖觀俗所謂樓觀也乃尹喜舊宅山脚有授經臺尚在遂與張杲之同至大秦寺早食而別有

太平宮道士趙宗有抱琴見送至寺作鹿鳴之引乃去又西至延生觀觀後上小山有唐玉真公主脩道之遺跡下山而西行十數里南入黑水谷谷中有潭名仙遊潭上有寺三倚峻峯面清溪樹林深翠怪石不可勝數潭水以繩絕石數百尺不得其底以瓦礫投之翔揚徐下食頃乃不見其清澈如此遂宿于中興寺寺中有玉女洞洞中有飛泉甚甘明日以忽憶尋蟆培方冬脫鹿泉二瓶歸至郿又明日乃至府

表山川良甚似水石亦堪儔惟有泉旁飲無人自獻酬

昔與子由遊蟆培時方

冬洞中溫溫如二三月

太白山下早行至橫渠鎮書崇壽院壁

馬上續殘夢不知朝日昇  
亂山橫翠障落月淡孤燈  
奔走煩郵吏安閒媿老僧  
再遊應眷眷亦記吾曾

留題延生觀後山上小堂

溪山愈好意無厭上到巉巉第幾尖  
深谷野禽毛羽怪上方仙子鬢眉纖  
不慙弄玉騎丹鳳應逐常娥駕老蟾  
澗草巖花自無主晚來蝴蝶入疎簾

留題仙遊潭中興寺寺東有玉女洞洞南有馬

融讀書石室過潭而南山石益竒潭上有橋  
畏其險不敢渡

清潭百丈皎無泥山木陰陰谷鳥啼蜀客曾遊明月峽  
秦人今在武陵溪獨攀書室窺巖竇還訪仙姝款石閨  
猶有愛山心未至不將雙脚踏飛梯

石鼻城

平時戰國今無在陌上征夫自不閒北客初來試新險  
蜀人從此送殘山獨穿暗月朦朧裏愁渡奔河蒼茫間

漸入西南風景變道邊脩竹水潺潺

礪溪石

墨突不暇黔孔席未嘗暖安知渭上叟跪石留雙胫一  
朝嬰世故辛苦平多難亦欲就安眠旅人譏客嬾

郿塢

衣中甲厚行何懼塢裏金多退足憑畢竟英雄誰得似  
臍脂自照不須燈

樓觀

秦始皇始立老子廟於  
觀南晉惠始修此觀

門前古碣卧斜陽閱世如流事可傷長有遊人悲晉惠  
強脩遺廟學秦皇丹砂久窖井水赤白木誰燒厨竈香  
聞道神仙亦相過只疑田叟是庚桑

九月二十日微雪懷子由弟二首

岐陽九月天微雪已作蕭條歲暮心短日送寒砧杵急  
冷官無事屋廬深愁腸別後能消酒白髮秋來已上簪  
近買貂裘堪出塞忽思乘傳問西琛

江上同舟詩滿篋鄭西分馬涕垂膺未成報國慙書劔

豈不懷歸畏友朋官舍度秋驚歲晚寺樓見雪與誰登  
遙知讀易東窗下車馬敲門定不應

病中聞子由得告不赴商州三首

病中聞汝免來商旅雁何時更著行遠別不知官爵好  
思歸苦覺歲年長著書多暇真良計從宦無功謾去鄉  
惟有玉城最堪隱萬人如海一身藏

近從章子聞渠說苦道商人望汝來說客有靈慙直道  
逋翁久沒厭凡才夷音僅可通名姓瘠俗無由辨頸顚

荅策不堪宜落此上書求免亦何哉

章子惇也

辭官不出意誰知敢向清時怨位卑萬事悠悠付杯酒  
流年冉冉入雙髭策曾忤世人嫌汝易可忘憂家有師  
此外知心更誰是夢魂相覓苦參差

病中大雪數日未嘗起觀貌令趙薦以詩相屬  
戲用其韻荅之

經旬卧齋閣終日親劑和不知雪已深但覺寒無奈飄  
蕭窗紙鳴堆壓簷板墮

閩中皆以板為簷

風飈助凝冽幃幔困



掀簸惟思近醇醲未敢窺瓌瑳何時反炎赫却欲躬白  
磨誰云坐無羶尚有裘充貨西隣歌吹發促席寒威挫  
崩騰踏成徑繚繞飛入坐人歡瓦先融飲雋餅屢卧嗟  
余獨愁寂空室自困圻欲為後日賞恐被遊塵浣寒更  
報新霽皎月懸半破有客獨苦吟清夜默自課詩人例  
窮蹇秀句出寒餓何當暴雪霜庶以躡郊賀

歲晚相與餽問為餽歲酒食相邀呼為別歲至除  
夜達旦不眠為守歲蜀之風俗如是余官歧下

歲暮思歸而不可得故為此三詩寄子由

餽歲

農功各已收歲事得相佐為歡恐無具假物不論貨山  
川隨出產貧富稱小大真盤巨鯉橫發籠雙兔卧富人  
事華靡綵繡光翻座貧者愧不能微摯出春磨官居故  
人少里巷佳節過亦欲舉鄉風獨倡無人和

別歲

故人適千里臨別尚遲遲人行猶可復歲行那可追問

歲安所之遠在天一涯已逐東流水赴海歸無時東鄰  
酒初熟西舍彘亦肥且為一日歡慰此窮年悲勿嗟舊  
歲別行與新歲辭去去勿回顧還君老與衰

守歲

欲知垂盡歲有似赴壑蛇脩鱗半已沒去意誰能遮况  
欲繫其尾雖勤知奈何兒童強不睡相守夜謹譁晨雞  
且勿唱更鼓畏添燭坐久燈燼落起看北斗斜明年豈  
無年心事恐蹉跎努力盡今夕少年猶可誇

和子由踏青

春風陌上驚微塵遊人初樂歲華新  
人間正好路旁飲  
麥短未怕遊車輪城中居人厭城郭  
喧闐曉出空四鄰  
歌鼓驚山草木動簞瓢散野鳥鳶  
馴何人聚衆稱道人  
遮道賣符色怒瞋宜蠶使汝蠶如甕  
宜畜使汝羊如麇  
路人未必信此語強為買服襖  
新春道人得錢徑沽酒  
醉倒自謂吾符神

和子由蠶市

蜀人衣食常苦艱蜀人遊樂不知還  
千人耕種萬人食一年辛苦一春閒  
閒時尚以蠶為市共忘辛苦逐欣歡  
去年霜降斫秋荻今年箔積如連山  
破瓢為輪土為釜爭買不翅金與紉  
憶昔與子皆童州年年廢書走市觀  
市人爭誇鬪巧智野人喑啞遭欺謾  
詩來使我感舊事不悲去國悲流年

和子由苦寒見寄

人生不滿百一別費三年三年吾有幾  
棄擲理無還長

恐別離中推我鬢與顏念昔喜著書別來不成篇細思  
平時樂乃謂憂所緣吾從天下士莫如與子歡羨子久  
不出讀書蝨生羶丈夫重出處不退要當前西羌解仇  
隙猛士憂塞壩廟謀雖不戰虜意久欺天山西良家子  
錦緣貂裘鮮千金買戰馬百寶粧刀環何時逐汝去與  
虜試周旋

和子由論書

吾雖不善書曉書莫如我苟能通其意常謂不學可貌

妍容有顰璧美何妨橢端莊雜流麗剛健含婀娜好之  
每自譏不謂子亦頗書成輒棄去繆被旁人裹體執本  
閤畧結束入細麼子詩亦見推語重未敢荷邇來又學  
射力薄愁官筈官箭十二把吾能十一把箭耳多好竟無成不精安用  
夥何當盡屏去萬事付懶惰吾聞古書法守駿莫如跛  
世俗筆苦驕衆中強鬼駭鍾張忽已遠此語與時左

記所見開元寺吳道子畫佛滅度以荅子由

西方真人誰所見衣被七寶從雙狻當時脩道頗辛苦

栢生兩肘烏巢肩初如濛濛隱山玉漸如濯濯出水蓮  
道成一旦就空滅奔會四海悲人天翔禽哀響動林谷  
獸鬼躑躅淚迸泉龐眉深目彼誰子遶牀彈指性自圓  
隱如寒月墮清晝空有孤光留故躔春遊古寺拂塵壁  
遺像久此霾香煙畫師不復寫名姓皆云道子口所傳  
從橫固已蔑孫鄧有如巨鯨吞小鮮來詩所誇孰與此  
安得攜掛其旁觀

和子由寒食



寒食今年二月晦樹林深翠已生煙  
遶城駿馬誰能借到處名園意盡便  
但挂酒壺那計盞偶題詩句不須編  
忽聞啼鴉驚羈旅江上何人治廢田

和劉長安題薛周逸老亭周最善飲酒未七十而致仕

近聞薛公子早退驚常流買園招野鶴  
鑿井動潛虬自言酒中趣一斗勝涼州  
飈然拂衣去親愛挽不留隱居亦何樂  
素志庶可求所亡嗟無幾所得不啻酬  
青春為

君好白日為君悠山鳥奏琴筑野花弄閒幽雖辭功與  
名其樂實素侯至今清夜夢尚驚冠壓頭誰能載美酒  
往以大白浮之子雖不識因公可與遊

中隱堂詩

并序

岐山宰王君紳其祖故蜀人也避亂來長安而遂家焉  
其居第園圃有名長安城中號中隱堂者是也予之長  
安王君以書戒其子弟邀予遊且乞詩甚勤因為作此  
五篇

去蜀初逃難遊秦遂不歸園荒喬木老堂在昔人非鑿  
石清泉激開門野鶴飛退居吾久念長恐此心違

徑轉如脩蟒坡垂似伏鼇樹從何代有人與此堂高好  
古嗟生晚偷閒厭久勞王孫早歸隱塵土污君袍

二月驚梅晚幽香此地無依依慰遠客皎皎似吳姝不  
恨故園隔空嗟芳歲徂春深桃杏亂笑汝益羈孤

翠石如鸚鵡何年別海孺貢隨南使遠載壓渭舟偏已  
伴喬松老那知故國遷金人解辭漢汝獨不潛然

都城更幾姓到處有殘碑古隧埋蚪蚪崩崖露伏龜安  
排壯亭榭收拾費金貲岫嶠何須到韓公浪自悲

鳳翔八觀 并敘

鳳翔八觀詩記可觀者八也昔司馬子長登會稽探禹  
穴不遠千里而李太白亦以七澤之觀至荊州二子蓋  
悲世悼俗自傷不見古人而欲一觀其遺跡故其勤如  
此鳳翔當秦蜀之交士大夫之所朝夕往來此八觀者  
又皆跬步可至而好事者有不能徧觀焉故作詩以告

欲觀而不知者

石鼓

冬十二月歲辛丑我初從政見魯叟舊聞石鼓今見之  
文字鬱律蛟蛇走細觀初以指畫肚欲讀嗟如箝在口  
韓公好古生已遲我今况又百年後強尋偏旁推點畫  
時得一二遺八九我車既攻馬亦同其魚維鱣貫之柳  
其詞云我車既攻我馬既同又云其魚維何維鱣維  
鯉何以貫之惟楊與柳惟此六句可讀餘多不可通  
器縱橫猶識鼎衆星錯落僅名斗模糊半已似癡牴詰

曲猶能辨跟肘娟娟缺月隱雲霧濯濯嘉禾秀莖莠漂  
流百戰偶然存獨立千載誰與友上追軒頡相唯諾下  
揖冰斯同轂轂憶昔周宣歌鴻雁當時籀史變蝌蚪厭  
亂人方思聖賢中興天為生耆耆東征徐虜闕虓虎北  
伏犬戎隨指嗾象胥雜沓貢狼鹿方邵駢翩賜圭卣遂  
因鼓輦思將帥豈為考擊煩矇瞍何人作頌比崧高萬  
古斯文齊岫嶽勲勞至大不矜伐文武未遠猶忠厚欲  
尋年歲無甲乙豈有名字記誰某自從周衰更七國竟

使秦人有九有掃除詩書誦法律投棄俎豆陳鞭杻當年何人佐祖龍上蔡公子牽黃狗登山刻石頌功烈後者無繼前無偶皆云皇帝巡四國烹滅強暴救黔首六經既已委灰塵此鼓亦當遭擊剖傳聞九鼎淪泗上欲使萬夫沉水取暴君縱欲窮人力神物義不汙秦垢是時石鼓何處避無乃天公令鬼守興亡百變物自閒富貴一朝名不朽細思物理坐歎息人生安得如汝壽

詛楚文

碑獲於開元寺土下今在太守便廳秦穆公葬于雍橐泉祈年觀下今墓在開

元寺之東南數十步則寺豈祈年之故基耶淮南王遷於蜀至雍道病卒則雍非長安此乃古雍也

崢嶸開元寺髣髴祈年觀舊築掃成空古碑埋不爛詛書雖可讀字法嗟久換詞云秦嗣王敢使祝用瓚先君穆公世與楚約相捍質之於巫咸萬葉期不叛今其後嗣王乃敢構多難剗胎殺無罪親族遭圍絆計其所稱訴何啻桀紂亂吾聞古秦俗面詐背不汗豈惟公子邛社鬼亦遭謾遼哉千歲後發我一笑祭



王維吳道子畫

何處訪吳畫普門與開元開元有東塔摩詰留手痕吾  
觀畫品中莫如二子尊道子實雄放浩如海波翻當其  
下手風雨快筆所未到氣已吞亭亭雙林間彩暈扶桑  
暎中有至人談寂滅悟者悲涕迷者手自捫蠻君鬼伯  
千萬萬相排競進頭如鼇摩詰本詩老佩芷襲芳蓀今  
觀此壁畫亦若其詩清且敦祇園弟子盡鶴骨心如死  
灰不復溫門前兩叢竹雪節貫霜根交柯亂葉動無數

一一皆可尋其源吳生雖妙絕猶以畫工論摩詰得之于象  
外有如仙翻謝籠樊吾觀二子皆神俊又於維也歛衽  
無間言

維摩像唐楊惠之塑在天柱寺

昔者子輿病且死其友子祀往問之跣躡鑿井自歎息  
造物將安以我為今觀古塑維摩像病骨磊嵬如枯龜  
乃知至人外生死此身變化浮雲隨世人豈不碩且好  
身雖未病心已疲此叟神完中有恃談笑可却千熊羆

當其在時或問法俛首無言心自知至今遺像兀不語  
與昔未死無增虧田翁俚婦那肯顧時有野鼠銜其髭  
見之使人每自失誰能與結無言師

東湖

吾家蜀江上江水綠如藍爾來走塵土意思殊不堪况  
當岐山下風物尤可慙有山秃如赭有水濁如泔不謂  
郡城東數步見湖潭入門便清奧恍如夢西南泉源從  
高來隨坡走涵涵東去觸重阜盡為湖所貪但見蒼石

螭開口吐清甘借汝腹中過胡為目眈眈新荷弄晚涼  
輕棹極幽探飄飄忘遠近偃息遺佩簪深有龜與魚淺

有螺與蚌曝晴復戲雨戢戢多於蟹浮沈無停餌倏忽

遽滿籃絲緝雖強致瑣細安足戡聞昔周道興翠鳳棲

孤嵐飛鳴飲此水照影弄粲粲此古飲鳳池也至今多梧桐合

抱如彭聃綵羽無復見上有鷗搏鷗嗟予生雖晚考古

意所矧圖書已漫漶猶復訪僑郊卷阿詩可繼此意久

已含扶風古三輔政事豈汝諳聊為湖上飲一縱醉後

談門前遠行客劫劫無留驂問胡不回首無乃趨朝參  
予今正踈懶官長幸見函不辭日遊再行恐歲滿三暮  
歸還倒載鐘鼓已齷齷音

真興寺閣

山川與城郭漠漠同一形市人與鷓鴣浩浩同一聲此  
閣幾何高何人之所營側身送落日引手攀飛星當年  
王中令斫木南山頽寫真留閣下鐵面眼有稜身強八  
九尺與閣兩崢嶸古人雖暴恣作事今世驚登者尚呀

金少口月夕二  
卷一  
喘作者何以勝曷不觀此閣其人勇且英

李氏園

李茂正園也今  
為王氏所有

朝遊北城東回首見脩竹下有朱門家破墻圍古屋舉  
鞭叩其戶幽響答空谷入門所見夥十步九移日異花  
兼四方野鳥喧百族其西引溪水活活轉墻曲東注入  
深林林深窻戶綠水光兼竹淨時有獨立鵲林中百尺  
松歲久蒼鱗蹙豈惟此地少意恐關中獨小橋過南浦  
夾道多喬木隱如城百雉挺若舟千斛陰陰日光淡黯

黯秋氣蓄盡東為方池野雁雜家鶩紅稜鷺合抱映島  
孤雲馥春光水溶漾雪陣風翻撲其北臨長溪波聲捲

平陸北山卧可見蒼翠間硤秃我時來周覽問此誰所  
築云昔李將軍負嶮乘衰叔抽錢算間口但未權羹粥

當時奪民田失業安敢哭誰家美園圃籍没不容贖此  
亭破千家鬱鬱城之麓將軍竟何事蟣蟲生刀韞何嘗

載美酒來此駐車轂空使後世人聞名頸猶縮

俗猶呼  
皇后園

蓋茂正謂  
其妻也

我今官正閒屢至因休沐人生營居止竟為

何人卜何當辨一身永與清景逐

秦穆公墓

橐泉在城東墓在城中無百步乃知昔未有此城秦人以泉識公墓昔公生不誅孟明豈有死之日而忍用其良乃知三子殉公意亦如齊之二子從田橫古人感一飯尚能殺其身今人不復見此等乃以所見疑古人古人不可望今人益可傷

和子由聞子瞻將如終南太平宮谿堂讀書



役名則已勤狗身則已媮我誠愚且拙身名兩無謀始  
者學書判近亦知問囚但知今當為敢問嚮所由士方  
其未得唯以不得憂既得又憂失此心浩難收譬如倦  
行客中路逢清流塵埃雖未脫暫憇得一漱我欲走南  
澗春禽始嚶啾鞅掌久不決爾來已徂秋橋山日月迫  
府縣煩差抽王事誰敢愬民勞更宜羞中間罹旱暵欲  
學喚雨鳩千夫挽一木十步八九休渭水涸無泥菑堰  
旋插脩對之食不飽餘事更遑求近日秋雨足公餘試

新菊劬勞幸已過，朽鈍不任鏤秋風。  
迫吹帽西阜可縱，遊聊為一日樂慰此百日愁。

將往終南和子由見寄

人生百年寄鬢鬚，富貴何啻葭中草。  
惟將翰墨留染濡，絕勝醉倒蛾眉扶。  
我今廢學如寒筭，久不吹之澁欲無。  
歲云暮矣嗟幾餘，欲往南溪侶禽魚。  
秋風吹雨涼生膚，夜長耿耿添漏壺。  
窮年弄筆衫袖烏，古人有之我願如。  
終朝危坐學僧趺，閉門不出閒履屨。  
鳧下視官爵如泥淤。

嗟我何為久踟躕歲月豈肯為汝居僕夫起餐秣吾駒  
七月二十四日以久不雨出禱磻溪是日宿虢  
縣二十五日晚自虢縣渡渭宿於僧舍曾閣  
閣故曾氏所建也夜久不寐見壁有前縣令  
趙薦留名有懷其人

龕燈明滅欲三更歌枕無人夢自驚深谷留風終夜響  
亂山銜月半床明故人漸遠無消息古寺空來有姓名  
欲向磻谿問姜叟僕夫屢報斗杓傾

二十六日五更起行至礮溪未明

夜入礮溪如入峽照山炬火落驚猿山頭孤月耿猶在  
石上寒波曉更喧至人舊隱白雲合神物已化遺蹤蜿  
安得夢隨霹靂駕馬上傾倒天瓢翻

是日自礮溪將往陽平憇於麻田青峰寺之下

院翠麓亭

不到峯前寺空來渭上村此亭聊可喜脩徑豈辭捫谷  
映朱欄秀山含古木尊路窮驚石斷林缺見河奔馬困

嘶青草僧留薦晚餐我來秋日午旱久石床溫安得雲  
如蓋能令雨瀉盆共看山下稻涼葉晚翻翻

二十七日自陽平至斜谷宿於南山中磻龍寺

橫槎晚渡碧澗口騎馬夜入南山谷音谷中暗水響瀧

瀧嶺上疎星明煜煜寺藏巖底千萬仞路轉山腰三百

曲風生饑虎嘯空林月黑驚麕竄脩竹入門突兀見深

殿照佛青熒有殘燭媿無酒食待遊人旋斫杉松煮溪

菽板閣獨眠驚旅枕木魚曉動隨僧粥起觀萬瓦鬱參

差目亂千巖散紅綠門前商賈負椒苳山後咫尺連巴  
蜀何時歸耕江上田一夜心逐南飛鵠

是日至下馬磧憇於北山僧舍有閣曰懷賢南  
直斜谷西臨五丈原諸葛孔明所從出師也

南望斜谷口三山如犬牙西觀五丈原鬱屈如長蛇有  
懷諸葛公萬騎出漢巴吏士寂如水蕭蕭聞馬櫓公才  
與曹丕豈止十倍加顧瞻三輔間勢若風捲沙一朝長  
星墜竟使蜀婦髻山僧豈知此一室老煙霞往事逐雲

散故山依渭斜  
客來空弔古  
清淚落悲笳

東坡全集卷一



欽定四庫全書薈要卷一萬四千八百三十四

集部

東坡全集卷二

宋 蘇軾 撰

詩八十二首

和子由記園中草木十一首

煌煌帝王都赫赫走羣彥嗟汝獨何為閉門觀物變微  
物豈足觀汝獨觀不勸牽牛與葵藜採摘入詩卷吾聞  
東山傳置酒攜嫵婉富貴未能忘聲色聊自遣汝今又  
不然時節看瓜蔓懷寶自足珍藝蘭那計畹吾歸於汝

處慎勿嗟歲晚

荒園無數畝草木動成林春陽一已敷妍醜各自矜蒲  
萄雖滿架困倒不能任可憐病石榴花如破紅襟葵花  
雖粲粲蒂淺不勝簪叢蓼晚可喜輕紅隨秋深物生感  
時節此理等廢興飄零不自由盛亦非汝能

種栢待其成栢成人亦老不如種叢篁春種秋可倒陰  
陽不擇物美惡隨意造栢生何苦艱似亦費天巧天工  
巧有幾肯盡為汝耗君看蔡與藿生意常草草

萱草雖微花孤秀自能拔亭亭亂葉中一一芳心插牽  
牛獨何畏詰曲自芽蘖走尋荆與榛如有宿昔約南齋  
讀書處亂翠曉如潑偏工貯秋雨歲歲壞籬落

蘆筍初似竹稍開葉如蒲方春節抱甲漸老根生鬚不  
愛當夏綠愛此及秋枯黃葉倒風雨白花搖江湖江湖  
不可到移植苦勤劬安得雙野鴨飛來成畫圖

行樂惜芳晨秋風常苦早誰知念離別喜見秋瓜老秋  
瓜感霜霰莖葉颯已槁宦遊歸無時若馬繫阜悲鳴

念千里耿耿志空抱多憂竟何為使汝玄髮縞

官舍有叢竹結根問囚廳下為人所徑上密不容釘慙  
懃戒吏卒插棘護中庭遶砌忽墳裂走鞭瘦吟屨我常  
攜枕簟來此蔭寒青日暮不能去卧聽窗風冷

芎藭生蜀道白芷來江南漂流到闕輔猶不失芳甘濯  
濯翠莖滿惜惜清露涵及其未花實可以資筐籃秋節  
忽已老苦寒非所堪斲根取其實對此微物慙

自我來闕輔南山得再遊山中亦何有草木媚深幽芎

蒲人不識生此亂石溝山高霜雪苦苗葉不得抽下有  
千歲根感縮如蟠虬長為鬼神守德薄安敢偷

我歸自南山山翠猶在目心隨白雲去夢繞山之麓汝  
從何方來笑齒粲如玉探懷出新詩秀語奪山綠覺來  
已茫昧但記說秋菊有如採樵子入洞聽琴筑歸來寫  
遺聲猶勝人間曲

八月十一日夜宿府學方和此詩夢  
與弟遊南山出詩數十篇夢中甚愛

之及覺唯記一句  
云蟋蟀悲秋菊

野菊生秋澗芳心空自知無人驚歲晚唯有暗蛩悲花

開澗水上花落澗水湄菊衰蛩亦蟄與汝歲相期楚客  
方多感秋風詠江離落英不滿劑何以慰朝饑

周公廟廟在岐山西北七八里廟後百許步有  
泉依山湧冽異常國史所謂潤德泉世亂則  
竭者也

吾今那復夢周公尚喜秋來過故宮翠鳳舊依山碑兀  
清泉長與世窮通至今遊客傷離黍故國諸生詠雨濛  
牛酒不來烏鳥散白楊無數暮號風

南溪之南竹林中新構一茆堂予以其所處最  
為深邃故名之避世堂

猶恨溪堂淺更穿脩竹林高人不畏虎避世已無心  
隱几頽如病忘言兀似瘖茆茨追上古冠蓋謝當今曉夢  
猿呼覺秋懷鳥伴吟暫來聊解帶屢去欲攜衾湖上行  
人絕堦前暮雪深應逢綠毛叟扣戶夜抽簪

自清平鎮遊樓觀五郡大秦延生仙遊往反四

日得十一詩寄舍弟子由同作

樓觀

鳥噪猿呼晝閉門  
寂寥誰識古皇尊  
青牛久已辭轅軻  
白鶴時來訪子孫  
山近朔風吹積雪  
天寒落日淡孤村  
道人應怪遊人衆  
汲盡堦前井水渾

五郡

古觀正依林麓斷  
居民來說水泉甘  
亂谿赴渭爭趨北  
飛鳥迎山不復南  
羽客衣冠朝上象  
野人香火祝春蠶  
汝師豈解言符命  
山鬼何知託老聃

觀有明皇碑言夢老子告以享國長



久之  
意

授經臺

乃南山一峯耳  
非復有築處

劍舞有神通草聖海山無事化琴工此臺一覽秦川小  
不待傳經意已空

大秦寺

晃蕩平川盡坡陀翠麓橫忽逢孤塔迥獨向亂山明信  
足幽尋遠臨風却立驚原田浩如海袞袞盡東傾

仙遊潭

五首潭上有寺三二在潭北循黑水而  
上為東路至南寺度黑水西里餘從馬

北上為西路至北寺東路險不可騎馬而西路  
隔潭潭水深不可測上以一木為橋不敢過故  
南寺有塔望之可  
愛而終不能到

翠壁下無路何年雷雨穿光搖巖上寺深到影中天我  
欲然犀看龍應抱寶眠誰能孤石上危坐試僧禪

潭

東去愁攀石西來怯渡橋碧潭如見試白塔苦相招野  
餽慙微薄村沽慰寂寥路窮斤斧絕松桂得干霄

南寺

唐初傳有此亂後不留碑畏虎關門早無村得米遲山  
泉自入甕野桂不勝炊信美那能久應先學忍饑

北寺

未應將軍聘初從季直遊絳紗生不識蒼石尚能留豈

害依梁冀何須困李侯吾詩慎勿刻猿鶴為君羞

馬融石室

洞裏吹簫子終年守獨幽石泉為曉鏡山月當簾鉤歲

晚杉楓盡人歸霧雨愁送迎應鄙陋誰繼楚臣謳

王女洞

愛玉女洞中水既致兩瓶恐後復取而為使者

見給因破竹為契使寺僧藏其一以為往來

之信戲謂之調水符

欺謾久成俗闕市有契繻誰知南山下取水亦置符古

人辨淄澠皎若鶴與鳧吾今既謝此但視符有無常恐  
汲水人智出符之餘多防竟無及棄置為長吁

自仙遊回至黑水見居民姚氏山亭高絕可愛  
復憇其上

山鷗曉辭谷似報遊人起出門猶屢顧慘若去吾里道  
途險且迂繼此復能幾溪邊有危構歸駕聊復祝愛此  
山中人縹眇如仙子平生慕獨往官爵同一屣胡為此  
谿邊眷眷若有竢國恩久未報念此慙且泚臨風浩悲

咤萬世同一軌何年謝簪紱丹砂留迅晷

南谿有會景亭處衆亭之間無所見甚不稱其名余欲遷之少西臨斷岸西嚮可以遠望而力未暇特為製名曰招隱仍為詩以告來者庶幾遷之

飛簷臨古道高榜勸遊人未即令公隱聊須濯路塵  
茆分聚落煙火傍城闈林缺湖光漏窗明野意新  
居民誰白帽過客謾朱輪山好留歸屐風迴落醉巾  
他年誰

金少口月  
卷二  
改築舊製不須因再到吾雖老猶堪作坐賓

凌虛臺

才高多感激道直無往還不如此臺上舉酒邀青山  
山雖云遠似亦識公顏崩騰赴幽賞披豁露天慳落日  
銜翠壁暮雲點煙鬢浩歌清興發放意末禮刪是時歲  
云暮微雪灑袍斑吏退迹如掃賓來勇躋攀臺前飛雁  
過臺上彫弓彎聯翩向空墜一笑驚塵闌

竹齋

野人獻竹髀腰腹大如盜自言道旁得採不費置罔鷓  
夷讓圓滑混沌慙瘦爽兩牙雖有餘四足僅能髣逢人  
自驚蹶悶若兒脫襁念茲微陋質刀几安足枉就禽太  
倉卒羞愧不能饗南山有孤熊擇獸行舐掌

漢陂魚

陂在鄆縣

霜筠細破為雙掩中有長魚如卧劍紫荇穿顛氣慘悽  
紅鱗照坐光磨閃攜來雖遠鬣尚動烹不待熟指先染  
坐客相看為解顏香粳飽送如填塹早歲嘗為荆渚客

黃魚屢食沙頭店濱江易採不復珍盈尺輒棄無乃僭  
自從西征復何有欲致南烹嗟久久游儵瑣細空自腥  
亂骨縱橫動遭砭故人遠餽何以報客俎久空驚忽贍  
東道無辭信使頻西隣幸有庖鑿醎

讀道藏

嗟予亦何幸偶此琳宮居宮中復何有戢戢千函書盛  
以丹錦囊冒以青霞裾王喬掌闕籥蚩尤守其廬乘閒  
竊掀攪涉獵豈暇徐至人悟一言道集由中虛心閑反



自照皎皎如芙蓉千載厭世去此言乃蘧藤人皆忽其  
身治之用土苴何暇及天下幽憂吾未除

十二月十四日夜微雪明日早往南谿小酌至  
晚

南谿得雪真無價走馬來看及未消獨自披榛尋履迹  
最先犯曉過朱橋誰憐破屋眠無處坐覺村饑語不囂  
惟有暮鷗知客意鷺飛千片落寒條

九月中曾題二小詩於南溪竹上既而忘之昨

日再遊見而錄之

湖上蕭蕭踈雨過山頭靄靄暮雲橫  
陂塘水落荷將盡  
城市人歸虎欲行

誰謂江湖居而為虎豹宅  
焚山豈不能愛此千竿碧

司竹監燒葦園因召都巡檢柴貽勗左藏以其  
徒會獵園下

官園刈葦歲留槎  
深冬放火如紅霞  
枯槎燒盡有根在  
春雨一洗皆萌芽  
黃狐老兔最狡捷  
賣侮百獸常矜誇

年年此厄竟不悟但愛蒙密爭來家風迴焰卷毛尾熱  
欲出已被蒼鷹遮野人來言此最樂徒手曉出歸滿車  
巡邊將軍在近邑呼來颯颯從矛叉戍兵久閑可小試  
戰鼓雖凍猶堪槌雄心欲搏南澗虎陣勢頗學常山蛇  
霜乾火烈聲爆野飛走無路號且呀迎人截來若逢箭  
避犬逸去窮投且擊鮮走馬殊未厭但恐落日催棲鷓  
樊旗仆鼓坐數獲鞍挂雉兔肩分麇主人置酒聚狂客  
紛紛醉語晚更譁燎毛燔肉不暇割飲啗直欲追羲媧

青丘雲夢古所吒與此何啻百倍加苦遭諫疏說夷羿  
又被賦客朝淫奢豈如閒官走山邑放曠不與趨朝衙  
農工已畢歲云暮車騎雖少賓殊佳酒酣上馬去不告  
獵獵霜風吹帽斜

和子由木山引水二首

蜀江久不見滄浪江上枯槎遠可將去國尚能三犢載  
汲泉何愛一夫忙崎嶇好事人應笑冷淡為歡意自長  
遙想納涼清夜永窻前微月照汪汪

千年古木卧無梢浪卷沙翻去似飄幾度過秋生鮮暈  
至今流潤應江潮泣然疑有蛟龍吐斷處人言霹靂焦  
材大古來無適用不須鬱鬱慕山苗

寄題興州晁太守新開古東池

百畝新池傍郭斜居人行樂路人誇自言官長如靈運  
能使江山似永嘉縱飲坐中遺白帔幽尋盡處見桃花  
不堪山鳥號歸去長遣王孫苦憶家

華陰寄子由

三年無日不思歸夢裏還家旋覺非臘酒送寒催去國  
東風吹雪滿征衣三峰已過天浮翠四扇行看日照扉  
里堠消磨不禁盡速攜家餉勞驂駢

和董傳留別

麤繒大布裹生涯腹有詩書氣自華厭伴老儒烹瓠葉  
強隨舉子踏槐花囊空不辦尋春馬眼亂行看擇壻車  
得意猶堪誇世俗詔黃新濕字如鴉

次韻柳子玉見寄

薄雷輕雨曉晴初陌上春泥未濺裾行樂及時雖有酒  
出門無侶謾看書遙知寒食催歸騎定把鷓鴣夷載後車  
他日見邀須強起不應辭病似相如

送曾子固倅越得燕字

醉翁門下士雜選難為賢曾子獨超軼孤芳陋羣妍昔  
從南方來與翁兩聯翩翁今自憔悴子去亦宜然賈誼  
窮適楚樂生老思燕那因江鱸美遽厭天庖羶但苦世  
論隘聒耳如蝸蟬安得萬頃池養此橫海鱣

王頤赴建州錢監求詩及草書

我昔識子自武功寒廳夜語樽酒同酒闌燭盡語不盡  
倦僕立寐僵屏風丁寧勸學不死訣自言親受方瞳翁  
嗟余聞道不早悟醉夢顛倒隨盲聾爾來憂患苦摧剥  
意思蕭索如霜蓬羨君顏色愈少壯外慕漸少由中充  
河車挽水灌腦黑丹砂伏火入頰紅大梁相逢又東去  
但道何日辭樊籠未能便乞勾漏令官曹似是錫與銅  
留詩河上慰離別草書未暇緣怱怱



秀州僧本瑩靜照堂

鳥囚不忘飛馬繫常念馳靜中不自勝不若聽所之君  
看厭事人無事乃更悲貧賤苦形勞富貴嗟神疲作堂  
名靜照此語子謂誰江湖隱淪士豈無適時資老死不  
自惜扁舟自娛嬉從之恐莫見况肯從我為

石蒼舒醉墨堂

人生識字憂患始姓名粗記可以休何用草書誇神速  
開卷懍怛令人愁我嘗好之每自笑君有此病何年瘳

自言其中有至樂適意無異逍遙遊近者作堂名醉墨  
如飲美酒銷百憂乃知柳子語不妄病嗜土炭如珍羞  
君於此藝亦云至推墻敗筆如山丘興來一揮百紙盡  
駿馬倏忽踏九州我書意造本無法點畫信手煩推求  
胡為議論獨見假隻字片紙皆藏收不減鍾張君自足  
下方羅趙我亦優不須臨池更苦學完取絹素充衾裯

送安惇秀才失解西歸

舊書不厭百迴讀熟讀深思子自知他年名宦恐不免

今日棲遲那可追我昔家居斷還往著書不復窺園葵  
竭來東遊慕人爵棄去舊學從兒嬉狂謀謬算百不遂  
惟有霜鬢來如期故山松栢皆手種行且拱矣歸何時  
萬事早知皆有命十年浪走寧非癡與君未可較得失  
臨別惟有長嗟咨

送任伋通判黃州兼寄其兄孜

吾州之豪任公子少年盛壯日千里無媒自進誰識之  
有材不用令老矣別來十年學不厭讀破萬卷詩愈美

黃州小郡隔谿谷，茆屋數家依竹葺。知命無憂子何病，見賢不薦誰當恥。平泉老令更可悲，六十青衫貧欲死。桐鄉遺老至今泣，潁川大姓誰能筮。因君寄聲問消息，莫對黃鸝矜爪觜。

和子由初到陳州見寄二首

次韻

道喪雖云久，吾猶及老成。如今各衰晚，那更治刑名。懶惰便樗散，踈狂託聖明。阿奴須碌碌，門戶要全生。

舊隱三年別，杉松好在。不吾今尚眷眷，此意恐悠悠。閉

戶時尋夢無人可說愁還來送別處雙淚寄南州

次韻子由綠筠堂

愛竹能延客求詩剝挂墻風梢千蠹亂月影萬夫長  
谷鳥驚碁響山蜂識酒香只應陶靖節會聽北窓涼

送劉放倅海陵

君不見阮嗣宗臧否不挂口莫誇舌在牙齒牢是中  
惟可飲醇酒讀書不用多作詩不須工海邊無事日日  
醉夢魂不到蓬萊宮秋風昨夜入庭樹萼絲未老君先  
去

金方口力  
卷二  
君先去幾時迴劉郎應白髮桃花開不開

送錢藻出守婺州得英字

老手便劇郡高懷厭承明聊紆東陽綬一濯滄浪纓東  
陽佳山水未到意已清過家父老喜出郭壺漿迎子行  
得所願愴恨居者情吾君方急賢日旰坐邇英黃金招  
樂毅白璧賜虞卿子不少自貶陳義空崢嶸古稱為郡  
樂漸恐煩敲榜臨分敢不盡醉語醒還驚

送呂希道知和州

去年送君守解梁今年送君守歷陽年年送人作太守  
坐受塵土堆胸腸君家聯翩三將相富貴未已今方將  
鳳雛驥子生有種毛骨往往傳諸郎觀君崛鬱負竒表  
便合劔佩趨明光胡為小郡屢奔走征馬未解風帆張  
我生本自便江海忍恥未去猶傍徨無言贈君有長嘆  
美哉河水空洋洋

次韻王誨夜坐

愛君東閣能延客顧我閒官不計員策杖頻過如未厭

卜居相近豈辭遷莫將詩句驚搖落漸喜樽壘省撲緣  
待約月明池上宿夜深同看水中天

送文與可出守陵州

壁上墨君不解語見之尚可消百憂而况我友似君者  
素節凜凜欺霜秋清詩健筆何足數逍遙齊物追莊周  
奪官遣去不自覺曉梳脫髮誰能收江邊亂山赤如赭  
陵陽正在千山頭君知遠別懷抱惡時遣墨君解我愁

送劉道原歸覲南康



晏嬰不滿六尺長高節萬仞陵首陽青衫白髮不自歎  
富貴在天那得忙十年閉戶樂幽獨百金購書收散亡  
竭來東觀弄丹墨聊借舊史誅姦強孔融不肯下曹操  
汲黯本自輕張湯雖無尺筮與寸刃口吻排擊含風霜  
自言靜中閱世俗有似不飲觀酒狂衣巾狼藉又屢舞  
旁人大笑供千場交朋翩翩去略盡惟我與子猶徬徨  
世人共棄君獨厚豈敢自愛恐子傷朝來告別驚何速  
歸意已逐征鴻翔匡廬先生古君子挂冠兩紀鬢未蒼

定將丈度置膝上喜動隣里烹猪羊君歸為我道姓字  
幅巾他日容登堂

出都來陳所乘船上有題小詩八首不知何人  
作有感余心者聊為和之

蛙鳴青草泊蟬噪垂楊浦吾行亦偶然及此新過雨  
鳥樂忘罾魚樂忘鈎餌何心擇所安滔滔天下是  
煙火動村落晨光尚熹微田園處處好淵明胡不歸  
我行無疾徐輕楫信溶漾船留村市鬧聞發寒波漲

舟人苦炎熱宿此喬木灣清月未及上黑雲如頽山  
萬竅號地籟衝風散天池喧逐瞬息間還挂斗與箕  
潁水非漢水亦作蒲萄綠恨無襄陽兒令唱銅鞮曲  
我詩雖云拙心平聲韻和年來煩惱盡古井無由波

次韻張安道讀杜詩

大雅初微缺流風困暴豪張為詞客賦變作楚臣騷展  
轉更崩壞紛綸閱俊髦地偏蕃怪產源失亂狂濤粉黛  
迷真色魚鰕易券牢誰知杜陵傑名與謫仙高掃地收

千軌爭標看兩艘詩人例窮苦天意遣奔逃塵閣人亡  
鹿溟醜帝斬鼉艱危思李牧述作謝王褒失意各千里  
哀鳴聞九臯騎鯨遁滄海將虎得綈袍巨筆屠龍手微  
官似馬曹迂踈無事業醉飽死遊遨簡牘儀型在兒童  
篆刻勞令誰主文字公合把旌旄開卷遙相憶知音兩  
不遭般斤思郢質鯤化陋鱗濠恨我無佳句時蒙致白  
醪慙慙理黃菊未遣沒蓬蒿

送張安道赴南都留臺

我公古仙伯超然羨門姿偶懷濟物志遂為世所縻黃  
龍遊帝郊蕭韶鳳來儀終然反溟極豈復安籠池出入  
四十年憂患未嘗辭一言有歸意闔府諫莫移吾君信  
英睿搜士及茆茨無人長者側何以安予思歸來掃一  
室虛白以自怡遊於物之初世俗安得知我亦世味薄  
因循鬢生絲出處良細事從公當有時

傅堯俞濟源草堂

微官共有田園興老罷方尋隱退廬栽種成陰十年事

倉皇求買萬金無先生卜築臨清濟喬木如今似畫圖  
鄰里亦知偏愛竹春來相與護龍雛

陸龍圖詵挽詞

挺然直節庇我岷謀道從來不計身屬纊家無十金產  
過車巷哭六州民塵埃輦寺三年別罇俎岐陽一夢新  
他日思賢見遺像不論宿草更沾巾

成都府有思賢閣畫諸公像

胡完夫母周夫人挽詞

栢舟高節冠鄉鄰絳帳清風聳搢紳豈似凡人但慈母

能令孝子作忠臣當年織屨隨方進晚節稱觴見伯仁  
回首悲涼便陳迹凱風吹盡棘成薪

和柳子玉過陳絕糧

次韻二首

風雨蕭蕭夜晦迷不須嗚叫強知時多才久被天公怪  
闕食惟應爨婦知杜叟挽衣那及脛顏公食粥敢言炊  
詩人情味真嘗遍試問於君底事虧

如我自觀猶可厭非君誰復肯相尋圖書跌宕悲年老  
燈火青熒語夜深早歲便懷齊物志微官敢有濟時心

南行千里成何事一聽秋濤萬鼓音

潁州初別子由二首

征帆挂西風別淚滴清潁留連知無益惜此須臾景我  
生三度別此別尤酸冷念子似先君木訥剛且靜寡詞  
真吉人介石乃機警至今天下士去莫如子猛嗟我久  
病狂意行無坎井有如醉且墜幸未傷輒醒從今得閒  
暇默坐消日永作詩解子憂持用日三省

近別不改容遠別涕沾胸咫尺不相見實與千里同人



生無離別誰知恩愛重始我來宛丘牽衣舞兒童便知  
有此恨留我過秋風秋風亦已過別恨終無窮問我何  
年歸我言歲在東離合既循環憂喜迭相攻悟此長太  
息我生如飛蓬多憂髮早白不見六一翁

歐陽少師令賦所蓄石屏

何人遺公石屏風上有水墨希微蹤不畫長林與巨植  
獨畫我眉山西雪嶺上萬歲不長之孤松崖崩澗絕可  
望不可到孤煙落日相溟濛含風偃蹇得真態刻畫始

信天有工我恐畢宏韋偃死葬號山下骨可朽爛心難  
窮神機巧思無所發化為煙霏淪石中古來畫師非俗  
士摹寫物象略與詩人同願公作詩慰不遇無使二子  
含憤泣幽宮

陪歐陽公燕西湖

謂公方壯鬚如雪謂公已老光浮頰竭來湖上飲美酒  
醉後劇談猶激烈湖邊草木新著霜芙蓉晚菊爭煌煌  
插花起舞為公壽公言百歲如風狂赤松共遊也不惡

誰能忍饑啖仙藥已將天壽付天公彼徒辛苦吾差樂  
城上烏棲暮靄生銀缸畫燭照湖明不辭歌詩勸公飲  
坐無桓伊能撫箏

十月一日將至渦口五里所遇風留宿

長淮久無風放意弄清快今朝雪浪滿始覺平野隘兩  
山控吾前吞吐久不噉孤舟繫柔本終夜舞澎湃舟人  
更傳呼弱纜恃管蒯平生傲憂患久已恬百怪鬼神欺  
吾窮戲我聊一噫餅中尚有酒信命誰能戒

出潁口初見淮山是日至壽州

我行日夜向江海  
楓葉蘆花秋興長  
平淮忽迷天遠近  
青山久與船低昂  
壽州已見白石塔  
短棹未轉黃茅岡  
波平風軟望不到  
故人久立煙蒼茫

壽州李定少卿出餞城東龍潭上

山鷓噪處古靈湫  
亂沫浮涎遶客舟  
未暇然犀照竒鬼  
欲將燒燕出潛虯  
使君惜別催歌管  
村巷驚呼聚攫猴  
此地他年頌遺愛  
觀魚并記老莊周

濠州七絕

塗山

下有繇廟山  
前有禹會村

川鎖支祁水尚渾地埋汪罔骨應存樵蘓已入黃熊廟  
烏鵲猶朝禹會村

彭祖廟

有雲母山云彭  
祖所採服也

跨歷商周看盛衰欲將齒髮鬪蛇龜空餐雲母連山盡  
不見蟠桃著子時

逍遙臺

莊子祠堂在開  
元寺即墓為堂

金少曰卷之三  
卷二  
常怪劉伶死便埋豈伊忘死未忘骸烏鳶奪得與螻蟻  
誰信先生無此懷

觀魚臺

欲將同異較錙銖肝膽猶能楚越如若信萬殊歸一理  
子今知我我知魚

虞姬廟

帳下佳人拭淚痕門前壯士氣如雲倉皇不負君王意  
只有虞姬與鄭君

四望亭

大和中刺史劉嗣之立李紳以太子賓客分司東都過濠為作記記今存而亭

廢者數年矣

頽垣破礎沒柴荆故老猶言短李亭敢請使君重起廢  
落霞孤鶩換新銘

浮山洞

洞在淮上夏潦不能及而冬不如高故人疑其浮也

人言洞府是鼇宮升降隨波與海通共坐船中那得見  
乾坤浮水水浮空

東坡全集卷二



謹案卷一第三頁後四行以近山地美刊本山訛

曲據施本改

卷二第一頁後一行慎勿嗟歲晚刊本歲晚訛晚  
歲據施本改

第十二頁後七行未能便乞勾漏令刊本勾漏訛  
岫嶼據施本改

第十五頁前四行只應陶靖節刊本靖訛靜據陶  
潛傳改

第十八頁後二行述作謝王褒刊本缺褒字據施

本補

第二十四頁前一行記今存而亭廢者數年矣刊

本脫記字據施本增



總校官庶吉士臣張能照

校對官助教臣金學詩

謄錄監生臣張同巽

欽定四庫全書薈要

集部

東坡全集卷三

四

詳校官助教<sub>臣</sub>常循



欽定四庫全書薈要卷一萬四千八百三十五

集部

東坡全集卷三

宋 蘇軾 撰

詩七十六首

泗州僧伽塔

我昔南行舟繫汴逆風三日沙吹面舟人共勸禱靈塔  
香火未收旗脚轉回頭頃刻失長橋却到龜山未朝飯  
至人無心何厚薄我自懷私欣所便耕田欲雨刈欲晴  
去得順風來者怨若使人人禱輒遂造物應須日千變

我今身世兩悠悠去無所逐來無戀得行固願留不惡  
每到有求神亦倦退之舊云三百尺澄觀所營今已換  
不嫌俗士汙丹梯一看雲山遠淮甸

龜山

我生飄蕩去何求再過龜山歲五周身行萬里半天下  
僧卧一庵初白頭地隔中原勞北望潮連滄海欲東遊  
元嘉舊事無人記故壘摧頽今在不  
宋文帝遣將拒魏  
太武築城此山

發洪澤中途遇大風復還

風浪忽如此吾行欲安歸掛帆却西邁此計未為非  
洪澤三千里安流去如飛居民見我還勞問亦依依攜酒  
就船賣此意厚莫違醒來夜已半岸木聲向微明日淮  
陰市白魚能許肥我行無南北適意乃所祈何勞美澎  
湃終夜搖窻扉妻孥莫憂色更典篋中衣

十月十六日記所見

風高月暗水雲黃淮陰夜發朝山陽山陽曉霧如細雨  
炯炯初日寒無光雲收霧卷已亭午有風北來寒欲僵

忽驚飛電穿戶牖迅駛不復容遮防市人顛沛百賈亂  
疾雷一聲如頽墻使君來呼晚置酒坐定已復日照廊  
恍惚所見皆夢寐百種變怪旋消亡共言蛟龍厭舊穴  
魚鼈隨徙空陂塘愚儒無知守章句論說黑白推何祥  
惟有主人言可用天寒欲雪飲此觴

廣陵會三同舍各以其字為韻仍邀同賦

劉貢父

去年送劉郎醉語已驚衆如今各漂泊筆硯誰能弄我



命不在天羿殼未必中作詩聊遣意老大慵譏諷夫子  
少年時雄辯輕子貢爾來再傷弓戢翼念前痛廣陵三  
日飲相對恍如夢况逢賢主人白酒潑春甕竹西已揮  
手灣口猶屢送羨子去安閒吾邦共喧闕

孫巨源

三年客京輦憔悴難具論揮汗紅塵中但隨馬蹄翻人  
情貴往返不報生旣根坐令平生友終歲不及門南來  
實清曠但恨無與言不謂廣陵城得逢劉與孫異趣不

兩立譬如王孫猿吾儕久相聚恐見疑排根我編類中  
散子通真巨源絕交固未敢且復東南奔

劉莘老

江陵昔相遇幕府稱上賓再見明光宮我冠挹縉紳如  
今三見子坎坷為逐臣朝遊雲霄間欲分丞相茵莫落  
江湖上遂與屈子隣了不見喜愠子豈真可人邂逅成  
一歡醉語出天真士方在田里自比涓與莘出試乃大  
謬芻狗難重陳歲晚多霜露歸耕當及辰

遊金山寺

我家江水初發源，宦遊直送江入海。聞道潮頭一丈高，  
天寒尚有沙痕在。中泠南畔石盤陀，古來出沒隨濤波。  
試登絕頂望鄉國，江南江北青山多。羈愁畏晚尋歸楫，  
山僧苦留看落日。微風萬頃靴文細，斷霞半空魚尾赤。  
是時江月初生魄，二更月落天深黑。江心似有炬火明，  
飛焰照山棲鳥驚。悵然歸卧心莫識，非鬼非人竟何物。  
江山如此不歸山，江神見怪驚我頑。我謝江神豈得已。

有田不歸如江水

是夜所見如此

自金山放船至焦山

金山樓觀何眈眈  
撞鐘擊鼓聞淮南  
焦山何有有修竹  
採薪汲水僧兩三  
雲霾浪打人迹絕  
時有沙戶祈春蠶  
我來金山更留宿  
而此不到心懷慙  
同遊盡返決獨往  
賦命窮薄輕江潭  
清晨無風浪自湧  
中流歌嘯倚半酣  
老僧下山驚客至  
迎笑喜作已人談  
自言久客忘鄉井  
只有彌勒為同龕  
困眠得就紙帳暖  
飽食未厭山蔬甘

山林饑卧古亦有無田不退寧非貪展禽雖未三見黜  
叔夜自知七不堪行當投劾謝簪組為我佳處留茆庵  
吳人謂水中可田者為沙焦山長老中江人也

### 甘露寺

江山豈不好獨遊情易闌但有相攜人何必素所歡我  
欲訪甘露當途無閒官二子舊不識欣然肯聯鞍古郡  
山爲城層梯轉朱欄樓臺斷崖上地窄天水寬一覽吞  
數州山長江漫漫却望大明寺惟見烟中竿很石卧庭

下穹隆如伏獬緬懷卧龍公挾策事瑯嶞一談收獍子  
再說走老瞞名高有餘想事往無留觀蕭公古鐵鑊相  
對空團團坡陀受百斛積雨生微瀾泗水逸周鼎渭城  
辭漢盤山川失故態怪此能獨完僧繇六亿人霓衣挂  
冰紈隱見十二壘觀者疑夸謾破板陸生畫青猊戲盤  
跚上有二天人揮手如翔鸞筆墨雖欲盡典型垂不刊  
赫赫贊皇公英姿凜以寒古柏親手種挺然誰敢干枝  
撐雲峰裂根入石窟蟠雜草得斷碑斬崖出金棺瘞藏

豈不牢見伏理可歎四雄皆龍虎遺迹儼未刊方其盛  
壯時爭奪肯少安廢興屬造物遷逝誰控搏况彼妄庸  
子而欲事所難古今共一軌後世徒辛酸聊興廣武歎  
不待雍門彈

次韻子由柳湖感物

憶昔子美在東屯數間茆屋蒼山根朝吟草木調蠻獠  
欲與猿鳥爭啾喧子今憔悴衆所棄驅馬獨出無往還  
惟有柳湖萬株柳清陰與子共朝昏胡為譏評不少借

生意凌挫難為繁柳雖無言不解愠世俗乍見應憮然  
嬌姿共愛春濯濯豈問空腹脩蛇蟠朝看濃翠傲炎赫  
夜愛踈影搖清圓風翻雪陣春絮亂蠹響啄木秋聲堅  
四時盛衰各有態搖落淒愴驚寒溫南山孤松積雪底  
抱凍不死誰復賢

送蔡冠卿知饒州

吾觀蔡子與人遊掀脰笑語無不可平時儻蕩不驚俗  
臨事迂濶乃過我橫前坑穿衆所畏布路金珠誰不裹



爾來變化驚何速昔號剛強今亦頗憐君獨守廷尉法  
晚歲却理鄱陽柁莫嗟天驥逐羸牛欲試良玉須猛火  
世事徐觀真夢寐人生不信長轆軻知君決獄有陰功  
他日老人酬魏顆

次韻楊褒早春

窮巷淒涼苦未和君家庭院得春多不辭瘦馬騎衝雪  
來聽佳人唱踏莎破恨徑須煩麴蘖增年誰復怨羲娥  
良辰樂事古難並白髮青衫我亦歌細雨郊園聊種菜

冷官門戶可張羅  
放朝三日君恩重  
睡美不知身在何  
初到杭州寄子由二絕

眼看時事力難勝  
貪戀君恩退未能  
遲鈍終須投劾去  
使君何日換聾丞

聖明寬大許全身  
衰病摧頽自畏人  
莫上岡頭苦相望  
吾方祭竈請比隣

次韻柳子玉二首

地爐

細聲蚯蚓發銀瓶擁褐橫眠天未明  
哀髻鑷殘歌雪領  
壯心降盡倒風旌自稱丹竈錙銖火  
倦聽山城長短更  
聞道床頭惟竹几夫人應不解卿卿

俗謂竹几為竹夫人

紙帳

亂文龜殼細相連慣卧青綾恐未便  
絮似僧巾白氎布  
暖於蠻帳紫茸氈錦衾速卷持還客  
破屋那愁仰見天  
但恐嬌兒還惡睡夜深踏裂不成眠

獵日遊孤山訪惠勤惠思二僧

天欲雪雲滿湖樓臺明滅山有無水清石出魚可數林  
深無人鳥相呼臘日不歸對妻孥名尋道人實自娛道  
人之居在何許寶雲山前路盤紆孤山孤絕誰肯廬道  
人有道山不孤紙窗竹屋深自暖擁褐坐睡依團蒲天  
寒路遠愁僕夫整駕催歸及未晡出山迴望雲木合但  
見野鶻盤浮圖茲遊淡泊歡有餘到家恍如夢遽遽作  
詩火急追亡逋清景一失後難摹

李杞寺丞見和前篇復用元韻答之

獸在數魚在湖一入池檻歸期無誤隨弓旌落塵土坐

使鞭箠環呻呼追胥連保罪及孥

近屢獲鹽賊皆坐同保徙其家

百日

愁歎一日娛白雲舊有終老約朱綬豈合山人紆人生  
何者非遽廬故山鶴怨秋猿孤何時自駕鹿車去掃除  
白髮煩芎蒲麻鞋短後隨獵夫射弋狐兔供朝脯陶潛  
自作五柳傳潘閭畫入三峰圖吾年凜凜今幾餘知非  
不去慙衛蘧歲荒無術歸亡逋鵠則易畫虎難摹

再和

東望海西望湖山平水遠細欲無野人踈狂逐漁釣刺  
史寬大容歌呼君恩飽煖及爾孥才者不閑拙者娛穿  
巖度嶺脚力健未厭山水相縈紆三百六十古精廬出  
遊無伴籃輿孤作詩雖未造藩閩破悶豈不賢樗蒲君  
才敏贍兼百夫朝作千篇日未晡竭來湖上得佳句從  
此不看營丘圖知君篋櫃富有餘莫惜錦繡償管蘧窮  
多闕嶮誰先逋賭取名畫不用摹

遊靈隱寺得來詩復用前韻

君不見錢塘湖錢王壯觀今已無屋堆黃金斗量珠連  
盡不勞折簡呼四方宦遊散其孥宮闕留與閒人娛盛  
哀哀樂兩須臾何用多憂心鬱紆溪山處處皆可廬最  
愛靈隱飛來孤喬松百丈蒼髯鬚擾擾下笑柳與蒲高  
堂會食羅千夫撞鐘擊鼓喧朝脯凝香方丈眠氍毹絕  
勝絮被縫海圖清風時來驚睡餘遂超羲皇傲几蘧歸  
時棲鴉正畢逋孤煙落日不可摹

戲子由

宛丘先生長如丘宛丘學舍小如舟常時低頭誦經史  
忽然欠伸屋打頭斜風吹帷雨注面先生不愧傍人羞  
任從飽死笑方朔肯為兩立求秦優眼前勃磈何足道  
處置六鑿須天遊讀書萬卷不讀律致君堯舜知無術  
勸農冠蓋鬧如雲送老鹽齏甘似蜜門前萬事不掛眼  
頭雖長低氣不屈餘杭別駕無功勞畫堂五丈容旂旄  
重樓跨空雨聲遠屋多人少風騷騷平生所慙今不恥  
坐對疲氓更鞭筭道逢陽虎呼與言心知其非口諾唯



居高忘下真何益，氣節消縮今無幾。  
文章小技安足程，先生別駕舊齊名。  
如今衰老俱無用，付與時人分重輕。  
越州張中舍壽樂堂

青山偃蹇如高人，常時不肯入官府。  
高人自與山有素，不待招邀滿庭戶。  
卧龍蟠屈半東州，萬室鱗鱗枕其股。  
背之不見與無同，狐裘反衣無乃魯。  
張君眼力覩天奧，能遣荆棘化堂宇。  
持頤晏坐不出門，收攬竒秀得十五。  
才多事少厭閒寂，卧看雲煙變風雨。  
笋如玉筋椹如簪

強飲且為山作主不憂兒輩知此樂但恐造物怪多取  
春濃睡足午牕明想見新茶如潑乳

姚屯田挽詞

京口年來耆舊哀高人淪喪路人悲空聞韋叟一經在  
不見恬侯萬石時貧病只知為善樂逍遙却恨棄官遲  
七年一別真如夢猶記蕭然瘦鶴姿

送岑著作

懶者常似靜靜豈懶者徒拙則近于直而直豈拙歟夫

子靜且直雍容時卷舒嗟我復何為相得歡有餘我本  
不違世而世與我殊拙於林間鳩懶於冰底魚人皆笑  
其狂子獨憐其愚直者有時信靜者不終居而我懶拙  
病不受砭藥除臨行怪酒薄已與別淚俱後會豈無時  
遂恐出處踈惟應故山夢隨子到吾廬

吉祥寺賞牡丹

人老簪花不自羞花應羞上老人頭醉歸扶路人應笑  
十里珠簾半上鉤

吉祥寺僧求閣名

過眼榮枯電與風，久長那得似花紅。  
上人宴坐觀空閣，觀色觀空色即空。

和劉道原見寄

敢向清時怨不容，直嗟吾道與君東。  
坐談足使淮南懼，歸去方知冀北空。  
獨鶴不須驚夜旦，羣烏未可辨雌雄。  
廬山自古不到處，得與幽人子細窮。

和劉道原詠史

仲尼憂世接輿狂，臧穀雖殊竟兩亡。  
吳客漫陳豪士賦，桓侯初笑越人方。  
名高不朽終安用，日飲無何計亦良。  
獨掩陳編弔興廢，窓前山雨夜浪浪。

和劉道原寄張師民

仁義大捷徑，詩書一旅亭。  
相夸綬若若，猶誦麥青青。  
腐鼠何勞嚇，高鴻本自冥。  
顛狂不用喚，酒盡漸須醒。

送張職方吉甫赴閩漕六和寺中作

羨君超然鸞鶴姿，江湖欲下還飛去。  
空使吳兒怨不留。

青山漫漫七閩路門前江水去掀天寺後清池碧玉環  
君如大江日千里我如此水千山底

雨中遊天竺靈感觀音院

蠶欲老麥半黃前山後山雨浪浪農夫輟耒女廢筐白  
衣仙人在高堂

和蔡準郎中見遊西湖三首

夏潦漲湖深更幽西風落木芙蓉秋飛雪閣天雲拂地  
新蒲出水柳映洲湖上西時看不足惟有人生飄若浮

解顏一笑豈易得  
主人有酒君應留  
君不見錢塘遊宦  
客朝推囚暮決獄  
不因人喚何時休

城市不識江湖幽  
如與蟋蟀語春秋  
試令江湖處城市  
却似麋鹿遊汀洲  
高人無心無不可  
得坎且止乘流浮  
公卿故舊留不得  
遇所得意終年留  
君不見拋官彭澤  
令琴無絃中有酒  
醉欲眠時遣客休

田間決水鳴幽幽  
插秧未遍麥已秋  
相攜燒筍苦竹寺  
却下踏藕荷花洲  
船頭斫鮮細縷縷  
船尾炊玉香浮浮

臨風飽食得甘寢肯使細故胸中留君不見壯士憔悴  
時饑謀食渴謀飲功名有時無罷休

和子由柳湖久涸忽有水開元寺山茶舊無花  
今歲盛開

太昊祠東鐵墓西一罇曾與子同攜回瞻郡閣遙飛檻  
北望檣竿半隱堤飯豆羹藜思兩鵠飲河嘆水賴長蛻  
如今勝事無人共花下壺盧鳥勸提

長明燈下石欄干長共杉松鬪歲寒葉厚有稜犀甲健



花深少態鶴頭丹久陪方丈曼陀雨羞對先生首宿盤  
雪裏盛開知有意明年開後更誰看

六月二十七日望湖樓醉書

黑雲翻墨未遮山白雨跳珠亂入船  
卷地風來忽吹散望湖樓下水如天

放生魚鼈逐人來無主荷花到處開  
水枕能令山俯仰風船解與月裴回

烏菱白芡不論錢亂繫青菰裹綠盤  
忽憶嘗新會靈觀

滯留江海得加餐

獻花游女木蘭橈  
細雨斜風濕翠翹  
無限芳洲生杜若  
吳兒不識楚詞招

未成小隱聊中隱  
可得長閒勝暫閒  
我本無家更安往  
故鄉無此好湖山

七月一日出城舟中苦熱

涼飈呼不來  
流汗方被體  
稀星乍明滅  
暗水光瀰瀰  
香風過蓮芡  
驚枕裂魴鯉  
欠伸宿酒餘  
起坐濯清泚  
火雲

勢方壯未受月露洗身微欲安適坐待東方啓

宿餘杭法喜寺寺後綠野亭望吳興諸山懷孫

辛老學士

徙倚秋原上淒涼晚照中水流天不盡人遠思何窮問

謀知秦過看山識禹功

餘杭始皇所舍舟也西北舟枕山堯水繫舟山上

稻涼

初吠蛤柳老半書蟲荷背風翻白蓮腮雨退紅追遊慰

遲暮覓句效兒童北望苔溪轉遙憐震澤通烹魚得尺

素好在紫髯翁

宿臨安淨土寺

鷄鳴發餘杭到寺已亭午  
叅禪固未暇飽食良先務  
平生睡不足急掃清風宇  
閉門群動息香篆起煙縷  
覺來烹石泉紫筍發輕乳  
晚涼沐浴罷衰髮稀可數  
浩歌出門去暮色入村塢  
微月半隱山圓荷爭瀉露  
相攜石橋上夜與故人語  
明朝入山房石鏡炯當路  
昔照熊虎姿今為猿鳥顧  
廢興何足吊萬世一仰俯

自淨土步至功臣寺

落日岸葛巾晚風吹羽扇松間野步穩竹外飛橋轉神  
功鑿橫嶺巖石得巨片直度千人溝下有微流注岡巒  
蔚回合金碧爛明絢緬懷異姓王負擔此鄉縣長逢跨  
下辱屢乞桑間飯誰謂山石頑識此希世彥凜然英氣  
逼屹起猶聳戰他年萬騎歸父老恣歡宴錦繡被原野  
金珠散貧賤竇融既入朝吳芮空記面榮華坐銷歇閱  
世如郵傳惟有長明燈依然照深殿

遊徑山

衆峰來自天目山勢若駿馬奔平川中塗勒破千里足  
金鞭玉轡相回旋人言山住水亦住下有萬古蛟龍淵  
道人天眼識王氣結茆宴坐荒山顛精誠貫山石為裂  
天女下試顏如蓮寒窓暖足來扑朔夜鉢咒水降蜿蜒  
雪眉老人朝扣門願為弟子長叅禪爾來廢興三百載  
奔走兵會輸金錢飛樓湧殿壓山谷朝鐘暮鼓驚龍眠  
晴空偶見浮海蜃落日下數投村鳶有生共處覆載內  
擾擾膏火同烹煎近來愈覺世路隘每到寬處差安便

嗟余老矣百事廢却尋舊學心茫然問龍乞水歸洗眼

欲看細字銷殘年

龍井水洗  
病眼有效

自徑山回得呂察推詩用其韻招之宿湖上

多君貴公子愛山如愛色心隨葉舟去夢繞千山碧  
新詩到中路令我喜折屐古來軒冕徒操捨兩悲慄數朝  
辭簪笏兩脚得暫赤歸來不入府却走湖上宅寵辱吾  
久忘寧畏官長詰飄然便欲去誰在子思側君能從我  
遊出郭及未黑

宿望湖樓再和

新月如佳人出海初弄色娟娟到湖上  
潏潏搖空碧夜涼人未寢山靜聞響屐  
騷人故多感悲秋更慘慄君胡不相就  
朱墨紛黝赤我行得所嗜十日忘家宅  
但恨無友生詩病莫訶詰君來試吟咏  
定作鶴頭側改罷心愈疑滿紙蛟虵黑

夜泛西湖五絕

新月生魄迹未安纔破五六漸盤桓  
今夜吐艷如半璧



游人得向三更看

三更向闌月漸垂欲落未落景特竒明朝人事誰料得  
看到蒼龍西沒時

蒼龍已沒牛斗橫東方芒角昇長庚漁人收筒及未曉

船過惟有菰蒲聲

湖上禁漁皆  
盜釣者也

菰蒲無邊水茫茫荷花夜開風露香漸見燈明出遠寺  
更待月黑看湖光

湖光非鬼亦非仙風恬浪靜光滿川須臾兩兩入寺去

就視不見空茫然

焦千之求惠山泉詩

茲山定空中乳水滿其腹遇隙則發見臭味實一族淺  
深各有值方圓隨所蓄或為雲洶涌或作綫斷續或鳴  
空洞中雜佩間琴筑或流蒼石縫宛轉龍鸞戲餅罌走  
四海真偽半相瀆貴人高宴罷醉眼亂紅綠赤泥開方  
印紫餅截圓玉傾甌共歎賞竊語笑童僕豈如泉上僧  
盥灑自挹掬故人憐我病弱籠寄新馥欠伸北窓下晝

睡美方熟精品厭凡泉願子致一斛

荅任師中次韻

來詩勸以  
詩酒自娛

閒裏有深趣常憂兒輩知已成歸蜀計誰借買山資世  
事久已謝故人猶見思平生不飲酒對子敢論詩

沈諫議召遊湖不赴明日得雙蓮於北山下作

一絕持獻沈既見和又別作一首因用其韻

湖上棠陰手自栽問公更得幾回來水仙亦恐公歸去  
故遣雙蓮一夜開

詔書行捧縷金牋樂府應歌相府蓮莫忘今年花發處  
西湖西畔北山前

和歐陽少師會老堂次韻

一時冠蓋盡嚴終舊德年來豈易逢聞道堂中延蓋叟  
定應牀下拜梁松蠹魚自晒閒箱篋科斗長收古鼎鐘  
我欲棄官重問道寸筵何以得春容

和歐陽少師寄趙少師次韻

朱門有遺啄千里來燕雀公家冷如冰百呼無一諾平

生親友半遷逝公雖不怪旁人愕世事如今臘酒濃交  
情自古春雲薄二公凜凜和非同疇昔心親豈貌從白  
頭相映松間鶴清句更酬雪裏鴻何日揚雄一廛足却  
追范蠡五湖中

監試呈諸試官

我本山中人寒苦盜寸廩文詞雖少作勉強非天稟既  
得旋廢忘懶惰今十稔麻衣如再著墨水真可飲每聞  
科詔下白汗如流瀦此邦東南會多士敢題品芻蕘盡

蘭蓀香不數莢往貧家見珠貝眩晃自難審緬懷嘉祐  
初文格變已甚千金碎全璧百衲收寸錦調和椒桂釀  
咀嚼沙礫磳廣眉成半額學步歸蹕踈維時老宗伯氣  
壓群兒凜蛟龍不世出魚鮪初驚滄至音久乃信知味  
猶食堪至今天下士微管幾左衽謂當千載後石室祠  
高朕爾來又一變此學初誰論權衡破舊法芻豢笑凡  
飪高言追衛樂篆刻鄙曹沈先生周孔出弟子淵騫寢  
却顧老鈍軀頑朴謝鐫鏝諸君况才傑容我懶且噤聊

欲廢書眠秋濤諠午枕

望海樓晚景五絕

海上濤頭一線來  
樓前指顧雪成堆  
從今潮上君須上  
更看銀山二十回

橫風吹雨入樓斜  
壯觀應須好句誇  
雨過潮平江海碧  
電光時掣紫金蛇

青山斷處塔層層  
隔岸人家喚欲應  
江上秋風晚來急  
為傳鐘鼓到西興

樓下誰家燒夜香  
玉笙哀怨弄初涼  
臨風有客吟秋扇  
拜月無人見晚粧

沙河燈火照山紅  
歌鼓喧喧語笑中  
為問少年心在否  
角巾歌倒鬢如蓬

試院煎茶

蟹眼已過魚眼生  
颼颼欲作松風鳴  
蒙茸出磨細珠落  
眩轉遶甌飛雪輕  
銀瓶瀉湯誇第二  
未識古人煎水意

古語云煎水不煎茶

君不見昔時李生好客手自煎  
貴從活火發



新泉又不見今時潞公煎茶學西蜀定州花瓷琢紅玉  
我今貧病長苦饑分無玉盃捧娥眉且學公家作茗飲  
塼爐石铤行相隨不用撐腸拄腹文字五千卷但願一  
甌常及睡足日高時

孫莘老求墨妙亭詩

蘭亭蠶紙入昭陵世間遺迹猶龍騰顏公變法出新意  
細筋入骨如秋鷹徐家父子亦秀絕字外出力中藏稜  
嶧山傳刻典刑在千載筆法留陽冰杜陵評書貴瘦硬

此論未公吾不憑短長肥瘠各有態玉環飛燕誰敢憎  
吳興太守真好古購買斷缺揮縑繒龜跌入坐螭隱壁  
空齋晝靜聞登登竒蹤散出走吳越勝事傳說誇友朋  
書來乞詩要自寫為把粟尾書谿藤後來視今猶視昔  
過眼百世如風燈他年劉郎憶賀監還道同時須服膺

李公擇求黃鶴樓詩因記舊所聞於馮當世者

黃鶴樓前月滿川抱關老卒饑不眠夜聞三人笑語言  
羽衣著屐響空山非鬼非人意其仙石扉三扣聲清圓

洞中鏗鉉落門闕縹緲入石如飛煙鷄鳴月落風馭還  
迎拜稽首願執鞭汝非其人骨腥臙黃金乞得重莫肩  
持歸包裹弊席擅夜穿茅屋光射天里閭來觀已變遷  
似石非石鉛非鉛或取而有衆忿喧訟歸有司今幾年  
無功暴得喜欲顛神人戲汝真可憐願君為考然不然  
此語可信馮公傳

八月十日夜看月有懷子由并崔度賢良

宛丘先生自不飽更笑老崔窮百巧一更相過三更歸

古柏陰中看參昴去年舉君首宿盤夜傾闔酒赤如丹  
今年還看去年月露冷遙知范叔寒典衣自種一頃豆  
那知積雨生科斗歸來四壁草蟲鳴不如王江長飲酒

王江陳  
州道人

催試官考較戲作

八月十五夜色隨處好不擇茆簷與市樓況我官居  
似蓬島鳳味堂前野橘香劔潭橋畔秋荷老八月十八  
潮壯觀天下無鷗鵬水擊三千里組練長驅十萬夫紅

旗青蓋互明滅黑沙白浪相吞屠人生會合古難必此  
景此行那兩得願君聞此添蠟燭門外白袍如立鵠

八月十七復登望海樓自和前篇是日榜出余

與試官兩人復留五首

樓上煙雲怪不來樓前飛紙落成堆非關文字須重看  
却被江山未放迴

眼昏燭暗細行斜考閱精強外已誇明日失杯君莫怪  
早知安足不成地

亂山遮曉擁千層睡美初涼撼不應昨夜酒行君屢歎  
定知歸夢到吳興

天台桂子為誰香倦聽空塔夜點涼賴有明朝看潮在  
萬人空巷鬪新粧

秋花不見眼花紅身在孤舟兀兀中細雨作寒知有意  
未教金菊出蒿蓬

東坡全集卷三